



1354

Dr Knote

Einer Ehrenwerten Zunft zu Schiffleuten Basel

Zunftzytig Nr. 47

Dezember 2013

Maischterreed 2013

Thema: **D Wäärt vo unserer Schwyz**

Wenn s herbschtelet und d Bletter falle
und d Keschtene an Boode gnalle,
denn wämmer unser Zumpftmool gniesse.
Derzue derf ych Si hit begriesse.

Ai Eeregascht bi uns am Disch,
het s mit de Schiff, nit mit de Fisch.
Er isch - er mues nit Blangge schrubbe -
der CEO vo der Rhenus-Grubbe!

Der zwaiti Gascht, däa kaa guet feschte,
het nuur im Bruef e wyssy Weschte!
D Figuur zaigt glaar, y blyyb derby.
s kaa nuur der Begge-Maischter syy!

Y derf hitt s fimft Mool ze-n-Eych reede,
d Gedangge laufe loo und schneede!
Hit iber d Wäärt vo unserem Land,
und wie mer sy gänn uus der Hand!

Die Lingge wänn, die hänn e Maage,
unserer Sälbschtändigkait an Graage
Hänn die scho driiber noostudiert,
woo d EU uns denn aanefiert?

Der Schwyzer Flyss und d Qualideete
geen immer mee und steetig fleete!
Woo d aaneluegsch, daas stinggt aim richtig,
isch nuur no s Stitz verdiene wichtig!

Au d Schuele mien hit anderscht tigge.
S Wichtigscht isch am Leerblaan z fligge!
D Weerter Aastand und Respäggt
het me scho lang in d Egge gfäggt!

Mit Zyvylguraasch und s Sälbschtverdraue
kaasch hitte nimm uff d Noochber baue.
Me seet scho hit, d Freyzigigkait
Steert s Gmainwool und au d Sicherheit!

Me seet vyy! Wäärt, woo d Schwyz hänn bräggt,
hänn mir scho iber d Reeling gfäggt!
Wie sell Dy Grooskind daas verstoo?
Wänn mir denn d Schwyz soo hinterloo?

Ich wurd mer wintsche,
ass mer s wooge,
die Wäärt vo hitte z
hinderfrooge,
der Noochwält nit scho
d Zuekumpft z nää
und unserem Land e
Chance z gää!
Denn sinn mir nit die
beese Gaischter!
Daas sait Eych Eyre Schif-
fermaischter!



Franz Haerri

Dooteneerig

Wenn s herbschtelet, denn waisch, s goot ebbis
z änd,
woo gwaggse-n-isch und gläbt het gnau sy Zyt.
Eb Pflanze, Dier und Mentsche-n-au emänd,
bi alle-n-isch s uff aimool denn so wyt.

Der Dood isch ändlig, er lost sich nit verdryybe
Er kunnt und paggt Dy, wie-n-e kalte Wind.
Und mir wo doo sin und no derfe blyybe
saage dangerscheen und adie liebi Frind.

Mer druure-n-und hänn ys z verabschiide vo
unsere liebe Frind, em

Reto Ansastasia, gschtorbe-n-am 12. April 2013
und em **Eduard Aebi** gschtorbe-n-am 10. April 2013

Veteraane-Eerig

Wenn ebber langi fufzig Joor der Zumpft aageert,
denn gheert er, main y, sälbtverständlig geert.
Duet ebber fimfesibzig Joor am Buggel draage,
denn derfsch au doo derzue bestimmt e baar Wort
saage!

Mer grateliere dääne Frind vo ganzem Häärze.
Mer wintsche Gsundhait, Gligg und bsunders kaini
Schmäärze!
S isch scheen, wenn me soo Jubiläe fyre kaa,
mer stoose gäärn mit Eych drum hitte-n-au druff
aa!

Häärzlig willkomme im Grais vo de Veteraane

Arthur Amm, geboore-n-am 15. Jänner 1938 und
Peter Hess, geboore-n-am 25. Augschte 1938